

48386

جمهورية مُهجة

عماد طنطاوى

دار
الكتاب
والفكر
للطباعة والنشر

2014

جمهورية مُهجة

تأليف : عماد طنطاوي

الطبعة الأولى : 2014م

رقم الايداع : 2013-8684

الترقيم الدولي : 9-82-11-94-977-9887

الإخراج الفني: محمد غريب

mohdghrib@gmail.com

الرسام: محمود فتّيح


تصميم الغلاف: إجلال محمد

دار روعة للطبع والنشر والتوزيع

المدير العام: هبة الشرقاوي

هاتف: 00201140178144

darrawaa@yahoo.com



إهداء

لـ مُهجة الحب... مُهجة الوطن... مُهجة البيوت... مُهجة الشوارع... مُهجة الغيطان..

لـ مُهجة اللى علمتنى الحب

لـ رحمة ربنا الواسعة اللى إتجسدت فى دفى العيلة وشهامة المصرين الجدعان
ولاد البلد فى أسرة إسكندرانية إسمها أسرة مجدى حافظ وهالة شهاب...ل
مجدى حافظ وهالة شهاب وثمارهم الطيبة وأمل بكرة "لوى ولوجين"

لـ (طارق حسن وحمادة الفولى ودينا عاصم وحنان الإمبابى ورائدا الناقورى
وعاطف سلام ويسرى بهجت ومحمد فكرى الجزار وراقية جلال ومنى
الوراقى وإبراهيم الوراقى وطيف الملاك وسلوى عبد الغنى ودينا جاد المولى
وبسمة محمد وطارق عزيزو تميم الصاوى ومروة عمر ومنال خفاجى وهالة
عبد الرحمن وهالة متولى ومحمد حامد وحازم حسين ومصطفى غنيم
وسمية عبد المنعم وسامح مصطفى ومحسن حلمى وحنان الجندى وسمر
صويص وعصام بدر وعبد المعطى الفقى وحسن خليل ومحمد رضا وقائمة
طويلة من شركاء الرحلة ورفقاء الدرب وأصدقاء الميدان وأصدقاء العمر

لـ هبة الشرقاوى.....أول إيد إتمدت بالخير

وأفر الشكر للمصممة الرائعة إجلال محمد والصحفية سمية عبد المنعم

لـ روح أبويا وأمى اللى بفضل دعواتهم وتربيتهم كنت إنسان

لـ عماد طنطاوى وزوجته الحبيبة سارة وإبنه الجميل عمر

عماد طنطاوى

أطلس عيون مهجة

كانت عيون مُهجة...تشبه كتاب أطلس
لمة بلاد جمة.....
الشط من يمة .والبحر من يمة
وأنا برده من يمة بكتب ومش بخلص
راسيني يا أطلس
عشقى حدوده فين ؟
قالى على خدودها...رمان سبع فدانين
والباقى خوخ أحمر على جفن متكحل
وتلوميت عنبة وسبعترلاف نخلة...
وبتاع ميتين منحل
سجنوا العسل بالشوق...ومالهوشى ولا مدخل
على كل باب نخلة واقفة ورا نخلة
قولولى إيه أحلى.....!!!؟
لسعة معاها الرضا ف عيون بتشفييني
ولا كلام مجانيين بيقولى قوم وإرحل
عاجبك إهانتها ؟ مبسوط ومتكيف ؟!!!
لو شافوا ضحكتها !!!!!!!وهى بتخلف !!!!
ضحكة ورا ضحكة.....وجايبة ميت عيل !!!!
كان إتخرس بالذوق.....
لكن اللى شاف سوسو ولا اللى شاف فيفى

....معرفة ستات..... ولا عمره يتخيل ...!!!!!!!
...إن اللى ستات ...وبجد جد حريم
واحدة إسمها مهجة وتخص متولى
فبلاش بقى تقولى
ضحكة سناء أو ريم....ليهم رموش وخدود....
مهجة دى يابنى وطن ..معرفة شى أى حدود
الضحكة بالفدانين والرمش بالفدانين
والخد لو يتحسب رمانه بالموازين...
متكفهوش موازين وميزانه مش موجود.....

إتسرقنا

إتسرقنا.....
واللى سارق حبناه.....
مد إيدہ جوة منا لما كنا نعسانين
خد مشاعر كت جواهر.... خبيناها جوة منا من سنين
سابنا يومها محتارين.....!!!!
هى ضده...؟.. ولا أصلا كت معاد...!!
لم منا كل حاجة وأى حاجة
بس ساب جوانا بصمة.....لما فاتنا حسيناہ
كل حاجة جوة منا مش تمام
مش مكانها أو زمانها
الضلوع دى ناقصة ضلع... !!!!!
والوريد دا مش مكانه...!!!!
قلبى ناقص برده يجى ميت صمام.....!!!!
الحرامى قش منا كل حاجة ولا إيه !!؟؟
هوه بردك مش حرام.....!!
دا إحنا أصلا غلبانين.....
ولا يعنى عشان عيونه نور ورقة..!!!!
ببس بردك نصابين.....
محتالين.....
كسروا قلبى زى شقة.....

سرقوا منى أغلى حاجة...
عمر كله بنيته منى دقة دقة.....
إتسرقنا ...

بس كل مشاعرى صَحِيحُوا
شوفتوا حتى ضلوعى هبله وقاموا فرحوا
لما عقلى قال حرامى ؟؟؟؟...فيه حرامى ؟؟؟؟؟
ردوا هما وقالوا لاءة.....!!!!

وقت صعب

إتقابلنا ف وقت صعب
وقت كان العشق كدبة ومستحيل
والزمن.....
كان بياخد منا جنب
والضلوع زى القنابل...واقفة على شد الفتيل
كان قدرنا بنرسمه حبة دواير
واد وبنت...
بنت جدلت صبرها بعزم الضفاير
وواد نزل من قطر غربة
وقبل ما يحط الشنط فوق الرصيف
أكله قضبان الرحيل.....
كان نفسى أنام وأرتاح على خدك عنب
وأجمع قطوف الخوف ورمات الصبايا
صبت كيزان الحزن ف رحايا الغريب
ماكنتش تعرف يعنى إيه كلمة رحايا
زى الطواحين اللى دايرة من هوى التايه
ومدورين ترسين عرايا
كان الجرس فوق المحطة بينضرب بالمستحيل
تفتكرى إيه كان البديل.....!!!!؟؟؟؟
ومشيت يا قطر الغربة بتكمل للقدر سطرين

شبكة إيدین

وكفوف دموع وفراق ضلوع

مهروسة بین غنى الطواحين

وحروف بتحلم بالدفى وسط القصايد

لكن قدرها بینتهى ف شباك تذاكر

كل ما أذاكر.....یختفى الحلم المسافر....

ویتوه معاه الاسم ف العناوین

يلا إخرجى

بتهرجى.....؟؟؟
إنتى أكيد بتهرجى.....؟؟؟
ما فتحتك باب الخروج يلا إخرجى ؟!!!!
وإتزوقى وإتزىنى زى البنات
إتجوزى زى البنات
لفى الأساور بالصفيرمابقاش بينفع تضحيات...!!!!
أنا والفَرْح أصلا ضراير!!!!
هتاخذى إيه من حب شاعر قتله سيفه ؟!!!
وبيستلف تمن السجاير....
يلا إفتحى حضنك لخراط البنات
يرسم على سِدرِك تلاله
ويزوقك زى العروسة
ويلبسك طرحة جماله
إيه اللى جابرك عل الوجع وعلى إحتماله ؟؟؟؟
حلمتى إنتى ب كون بحاله....
لكن أنا.....
ما حلمتش أكثر من أحبك.....
يلا إخرجى وإتكحلى زى الصبايا
أنا نفسى أشوف ف عنيكى كُحلة

دوسى على وجع الحشيش عدى القناية.....
وحاسبى توبك ينجرح الدنيا وحلة
بصى على قطف العنب وإدينى ضهرك
هتلاقى شكل الدنيا أحلى
سيبى الوجع للموجوعين
وماتقلقيش عل اللى إنوجع أو شاب وجع
عدى الوجع بسنين وجع وفضلنا برده زى ما حنا
طين وناسى إنه طين

أسف قوى

(1)

أسف قوى
ما بقتشى عارف أرسلك إلا كده
دايرة وفيها "س" سؤال ؟::
بتحبني يا بن الحلال !!؟
خايفة أكون واحدة كده ساقها القدر وسط العيال
بتحبني ؟!!!!!!
بتحبني وعشان كده بتقول بحبك؟
ولا عشان حبة زواق وشويتين تقل ودلال ؟
رمشك صحيح عامل قلم وكاتبني قصة ؟!!!!!!
بتحبني زى الكلام اللي إنكتب فيا برموشك ؟!!!!!!
جايز قوى مقدرش أحوشك
لكن أنا أنا خايفة لسه
لسانى بغرق ف الحكاوى اللي إترمت فيها الصبية ع الرصيف
شافت ولا ستين وجع
كانت بتحلم ف الغرام لو لقمة من وش الرغبة
والناس قصاها طافحة من كتر الشبع !!!!
جايز أكون شبه الحالات اللي إنكتب فيها القصايد
جورنال وحبة بيتقرى وبيترمى زى الجرايد
خايفة قوى ومرعوبة من نظرة عنيك
خايفة تكون الجنة نار

وخايفة تبقى الجنة جنة ويبقى ضاع الاختيار
مابقتش فاهمة منى حاجة
ولا عارفة أوصلى لقرار

(2)

كانت إجابتي كلمة واحدة "ج" جواب :
حببتك إنتى واحدة من كومة بنات
ودخلت عينك من سكات
وقريت بعيني كل حاجة لقيتها شبهى
فصين لقلب بيتسند على ضلع غلب ب تكيات
خايف قوى يكسر مشاعره بالمجازفة
هصدقينى؟؟؟
أنا برده خايف.....زى ما إنتى برده خايفة
لكن كتير بيشدنى صوت السواقى اللى ف ضلوعك
صوت الحنين اللى ف دموعك
حضن الدفى اللى لقيته فيكى ف الشتا ورافض خضوعك
بيهزنى صوت الوابور اللى ف عنيكى
وقت إما بيبوس المحطة بعد فترات من الغياب
وف لحظة فيها بيلتقى شوق الأحبة ع المحطة
حضنين دفى ودموع وفى ف عز العتاب
"ماوحشتكيش؟؟؟؟؟؟؟؟؟؟
ساعتها بيكون الجواب من غير جواب "مليون بحبك"

أصعب دمة

أصعب دمة بتنزل منك
لما بتبعد روحك عنك
لما بتسجن نفسك فيك
لما تغمض عينك جامد
علشان تخنق نن عنيك
لما ب تحلم مرة ب واحد
هوه أساسا كان مش ليك
عارف.....
عمر الدنيا ما نصفت عاشق
أو بتطبطب على مخدوع
مهما تكون ف مشاعرك صادق
مهما هتبكى الدم دموع
مهما هتصرخ من جواك
أو هتقول إنك موجوع
بص لكل الناس حواليك
يمكن بس تحس بفارق
أو هتصدق مرة دموعك.....لما تقول إنك مخدوع
حاسس بيك...وب أنفاسك
وب إحساسك
نفسك مرة تحب بجد.....!؟؟؟؟

طيب حب
إفضل حب لحد ماتملى الدنيا كلام
إبنى مدينة عشق كبيرة
عيش نفسك زى ما قالت ف الأوهام
إبنى قصيدة ب ميت تنهيدة
وإصرخ جامد من جواك
"أيوة بحبك إنتى وبس"
مهما هتكتب.....
كل كلامك عند عنيتها بيبقى كلام
كلمة أخيرة ما يمكن تفهم
يمكن تعرف مرة وتقرى
عمر الحب ماكان للفقرا
حب الفقرا يا صاحبي حرام
عمر ماكان لوجوده وجود
نفسك تهرب منى وتجري
إفضل إجرى.....طيب إجرى
كل ماتجرىآخر الحارة طريق مسدود

البندقية

عشرين سنةوالبندقية معمرة
الطلقة ليه متأخرة.....والموت مجاش!!؟
البت لسه بتشتري بالقرش ساغ نبوت غفير!!
على ضهرها شنطة ألم لمة القلم والكراسات
رسمت خطوط بالمسطرة.....وقالتلى نحفر فيها بير
نسقى اللي فات من عمرنا ونقولنا فاضل كثير
وكتير مجاش
ماعرفشى يوصل عندنا ويقدر يطير
مع إننا كبرنا ب بلاش
وبلاش زمان من يجى كام عشرين سنة
كان بنت معدومة الضمير.....
باعت كتاب المدرسة برخص التراب
علشان جونلة قوصيرة...وأكلة كباب
ملعون أبو الفقر اللي بيذل القلوب
كان الجرس ..أم الحروب
إعلان ببدأ المعركة ف حوش الوجع
كانت عنيا مغربين لمة سرير مستشفى عام
الحوش بيزرع ف العيال معنى الشبع
واللعب أحسن م العلام
وعلام ماجيت أشرحها معنى الوجع

بصت عندها ع الكانونة اللى ف دراعى.....
وقالتلى مش نافع كلام.....
هتعيش ب كام \$ ؟ وتعيش لكام؟؟؟
الحى أبقى م اللى بينه وبين عزاه حبة رتوش
وأنا لسه شابة وإيدى بتروح للغوايش
على فكرة يا.....
أنا عشت بعدك يجى كام عشرين سنة وأهو لسه عايش....
يمكن تكون البندقية أجلت طيش الزناد!!
أنا برده أجلت العزا لنفس المعاد
مش فارقة مين فيكم إيمان أو مين وداد
ماهو كلكم نفس الشبه نفس الملامح
وأهو كله ف الآخر رماد
وأنا برده ف الآخر هسامح
ما أنا لسه نفس الواد بعبطه
معرفتش أكتب إسم تانى غير "عماد"

البنفسج

ومسكت إيديا اللي قاططة البنفسج
وبصت فى عيني وشاورت مكانه
فغار البنفسج وغارت عيدانه
فبعدت شوية وهمست ف ودنى
"بحبك بكل الغيطان اللي طرحت"
"بحبك بكل البنات اللي حبت... وسهرت وسرحت"
"بحبك بشوق العيال اللي كبرت فى كل الحوارى
ولعبت وفرحت"
فقرب صاحبنا وطرطق ودانه
فنزلت دموعى قصايد تغنى
وجدلت ضفاير عشانه وعشانه
فزادت حنانه فزود حنانه
فبدرت ف خدى جناين حنان
فصابه الجنان وهيح جيرانه
فل وريحان وهاتك يا حدف
حببتي اللي سكنت ضلوعى بصفاهها
ركبت دماغها وقفلت معاها
صاحبنا اللي عاند بيحدف بمية
وهية اللي هية بتسكن عنيا
بتحدف بألف

فكسبت حبيبتي اللى أصلا زرعت البنفسج عشانها
وخسر البنفسج جيرانه ورهانه
بحبك بكل البنفسج وغيرته
بحبك حبيبتي بشوق السحاب
لبدره اللى شايف جمالك منور وغرقان ف حيرته
بحبك بكل القصايد بحالها
وكلمة "بحبك" بكل اللى قالها
وسطر حروفها جميلة لحبيبته
بحبك وعارف طباعك وغيرتك
وقلبي اللى هزمه كلامك وسحرك
برغم الهزيمة بيعشق هزيمته

للحب ناسه

وغلّبت أقول للبت فوقي
الحب أصلا مش لنا ولاشكلنا...
ولاحتى يشبهنا ف وجع....
كانت عندها بيسرحوا جوة الحديث
وتقولى ليه يا سى الجدع ؟!!!!!!
مالك كده مكسر مراكبى ؟
وأنا أقولها أصله المراكبى
ماعرفشى يعشق مُهجة غير حواديت
الحب بحر بيعلى موجه للسحاب فبلاش خيابة
وعيالاه سيكنوا ف القصور زى الذوات
مابقاش بينفع يتوصف تبع الغلاية
أو ف الوجع ياخده الفقير كمسكنات
فكى الضفاير بالغوايش والحلق
وإتحني بالمية الذهب
إحنا ف زمان الأغنيا....
شعر البنات بيسرحوه بالبكنوت
وراح زمان مشط الخشب
تفتكرى ينفع تحلمى بمنديل بأوية!!؟
أو طرحة من سوق التلات ؟
وإنتى اللى ف إيديكى الذهب !!!!!!!

ياستى فوقى وإخلعى طرحة بهية
ما ياسين كفر بالمسرحية...والفقر كان أول سبب
مش فارقة مات فوق الحصان أو مات ب نله
الفقر خنجر وإتغرس جواه ب غله
فبلاش نلف الجوهرة ف خيش الوجع
خليك جدع وإكتب وقوله
حلمك تعيش ف عيونها مرة؟
وإنت ف زمان الأغنيا!!!!؟
حلم إفتراضى وإترسم فى غير محله

العيون المكسوفين

كانت عندها مكسوفين...أول ماحضنت إيدي إيديها
وإبتدى شوق الصوابع ف السلام
كان كسوف الدنيا متنيل واخذها.....!!!
وزى غيرها.....
كت بتحبس ف الكلام...
خجل الورود البكر نمل كفها الأبيض ب تلجه
طرحت غيطانه قطن أبيض..وإبتدى برموشها حلجه
عمل البلوزة والجونلة والطاقيّة والجوانتى وفاتلى سنتى.....!!!!!!
وقالى دى مساحة الكلام...
نزت ف إيدي شهدها المتصابى صبه..
غرقت خطوط إيدي العجوزة
فاضت حروف شعري عن الحد المؤدب لبيه ف حبه
رجرجتها وغرقت كُم البلوزة
فإبتدت تسحب صوابعها بهدوء
وبهدوء البحر رسمت خوفها لوزة
فَتَحَتِ أول ما بصيت بين عندها وقولت والقرآن "بحبك"
كان ساعتها خدها ماتقولش جنة
رص رمانه البناتى فوق شفايفها الجومال
وقفت سوق الدلال على رجل واحدة..وإبتدت تعمل طابور
كنت واقف عند طراطيف المشنة.....
وكنت أول حد بيسجل حضور

ضحكت فهزت بإبتسامتها الشوارع
وقالتلى عايز إيه يا "مودى"
قولتلها نفسى ف رمانية وزودينى بقرش نور
كنا ساعتها ف قلب ثكنات المعادى
ركنت سفينة سحرها على خد مرمر
وقالتلى عايز حاجة تانية.....؟.....قولتلها كوبيتين زبادى
إستغربت منى الكلام وقالتلى ليه!!!!!!؟؟؟؟؟؟؟؟؟؟
قولتلها أول لما أسيبك.....
ناوى أصوم عن أى واحدة ودولا علشان السحور
فقاتلى غمض طب ثوانى
غمضت عينى بتاع خمستاشر نهار
وفتحتها.....
لقيتها ضاعت منى تانى

ستة بيرة مشبرين

كانت عنيتها مالىنين إحساس لذيذ
بتقولى جايى مش بحبك.....
لكن أكيد إنسان عزيز
معرفش ليه حسيت عنيتها كدابين
كانوا دافينين والشوق مالىهم.....
ف ملتنى حيرة
كانوا زى ماتقول ستة بيرة
حلوين قوى ومشبرين
كت ناوية شوق تسكرنى بيهم
نزلت عينى فوق شفايفها الجومال
قولتلها بيرة إيه يامهجة...البيرة دى بتاعة العيال
صوبيلى من سحرك نبيذ
واسقى ف ضلوعى وشبعيهم
ضحكت وكانت زى موجة.....
بضفيرة حلوة وزجزجات
حسيت ساعتها بالعيون المعجزات
وملانى إحساس اللى عاجز
وسألت نفسى ...لما فيه فعلا حواجز

إزاي بتدخل جوة منى....
فقالتللى علم الذبذبات.....والبت فورة
مممكن بقى تمن الفاتورة
شارب ولا خمسين نبيذ
ضحك وحلاوة ورقة من النوع اللذيذ
إدفع بقى تمن الأرايز

•

الكانون

عشرين سنة ولسه الكانون بيشد من إيدها الحطب
ويولعه فى ضلوع ياسين....
لسه الضفيرة اللي إنعقد بيها الوجع على كتفها رغم السنين
لساها عين ع المطرحة وعين عل المراية
وماهش حكاية .حتى لو باظ العجين
تفتكرى مين كان السبب؟ أو مين سبب؟؟
طب مين خسر أو مين غلب...؟؟
وإحنا اللي جينا ع الميزان
ولقينا مركب حُبنا ماجبتشى حتى جرام ذهب!!
أو حتى نفعت مظلومين
لسانى شايفك زى ماسيبتك تمام
والضحكتين اللي ف عنيكى مولفين على عود سريس
مَسْكَة إيديكى للمقشاة بغيظ قوى وقت الكنيس
خنقة عنيكى من تراب الفقر مرة ومرة من عفر الدريس
ليه النهاردة بعد كام عشرين سنة بتكررى نفس الكلام!!!!؟؟؟؟
وبترفضى نفس العريس؟
وبتفتحي جرح إتقفل عشرين سنة
ليه النهاردة مغيرة إسمك وشكلك؟

كان إيه مشاكلك.....؟؟

إنى إنكسرت ف ريع سبب ما إختارت هوش!!!!!!

على فكرة ياأنا بردة شكلك

كرهت أبص فى عيني دايما

وكننت دايماوش واحد معرفوش

أيوة بحبك

أيوة بحبك.....

علشان ياما ب أكلم فيكى وماترديش
ب أعشق حتى الكدبة البيضاء اللي فستانك
وقت ما تبقى عيونك سارحة....
وأبقى هموت م الخوف علشانك
وأسأل مالك؟.....ماترديش
وأرجع وأسأل تانى عنيكى
وإنتى تردى ب "لاء مافيش"
أيوة بحبك.....

رغم سكوتك.....

لما بحاول أسمع صوتك
وأفضل أرن عليكى وألح
وإنتى تشوفى الرنة وعادى
ياكش أرن لحد الصبح
بعشق كُرهك ليا ساعات
وأعشق ظلمك لما بيعمل فى الصبح
وأفضل تايه بينى وبينك
وأفضل أبرر ليكى كتير
علشان أثبت بس لنفسىإنى بحبك
وقت صفاكىلما تحنى عليا برنة

ووقت جفاكى..... لما بيعمل منك جرح
أنا مش عايز منك شرح
ولا تبرير.....
عايزك بس تقولى لقلبك
إنى عملت بظلمك ليا..... أجمل غيبة
فيها إتناشر ألف حمامة وجيش عصافير
وإنى بحبك رغم الجرح وجرحى كبير

•

بحبك ولكن

بحبك ولكن.....

بيفضل كلامى مجرد كلام
وتفضل قصيدتى مجرد قصيدة
بتوصف مشاعرى ب حالة فصام
ف وقت إما اقرر أبطل أحبك
ووقت إما بأحلف هكمل غرام
بيص ف عنكى مايمكن تشوفى
ويمكن ساعتها تحسى بحروفى
وقلبى اللى تايه "يكمل" "يبطل"
يقرر ف لحظة يبطل صدام

بحبك ولكن.....

بتفضل عنكى مجرد سؤال
لإمتى المسافر بيفضل مسافر؟؟
لإمتى السفينة الحزينة اللى تاهت
بترمى الحمولة ف بحر المحال؟؟
لإمتى هيفضل كلامى اللى حاسه
بيكتم ف يأسه
وشايف حروفه وعشقه إحتمال
ياريت السنين اللى كبرت ما كبرت
ياريتك ياعمري.....فضلت بسنينك ف وسط العيال

بأدور عليكى ف كل الحوارى
ف صمت البيوت
ف زهرة بنفسج
نسيها الجانينى ورفضت تموت
ف ضحكة سحابة لصبر الغلاية
بأدور عليكى ف وسط الغيطان
وأول ما تعزف سواقى الربابة
بأدور وبسأل عيونك تملى
ف تبقى الاجابة.....
مجرد مشاعر
وكل الكلام اللى بأكتب حروفه ويرسم ملامحك
مجرد كتابةفعلا يامهجة مجرد كتابة

بنت مختلفة

عارفة.....

بشوفك بنت مختلفة.....

ومانتش زى كل الناس

بحب الضحكة ف عيونك

وأموت من رقة الإحساس

وأشك ضلوعى على إسمك ميتين سكة

وأزود سكى ميت تكة بميت ترباس

بلاقى ف عينك السكة

فى وقت الناس ما ينسونى....

يا عين أرواح وبنبونى

وأجمل م البنات تمن

كتير عينك بياخدونى

أدوق ف خدودك الملين

يا رمش ملاك

سقاها الحب حنية

وأنا حابك.....!!...بأكون عفريت

وبأمشى بشوقى ع المية

وأولع زى عود كبريت

أنور عينك السراذيب

وأشوفك أحلى جنية

يا عين مدخلها م الجنة

عيدان الورد ع التراكيب.....
بتشرب من دلالك شوق
بينزل ف المطر سراسيب...وغضبانة على المية.....!!!!
خدودك كلهم رمان....
ورمشك ألف شجرة توت
يا وردة فل من نورها الغيطان كرهت تشوف البدر
ليلاتي بأشوفه قرفان....وغيران
وواخذ ستوميت شلوت
عيونك غيرت كونيبقمخ غيطانك الدهبي....
وطابت فيكي قمحاته وحان ضمك
شمسي شارقة من يمك
وخايف تخلصي بسببي
ما كل شوية بردان.....!!!!
بأموت م البرد.....!!!!
بحبك لما يتدفي ضلوعى بوصلك الدافى
بأروح وأجمع من الجفن البعيد ضحكة وحزمة ورد
وأعلقهم على أكتافى....
وبأدفي وأناام فرحان
فشكرا يا أم روح حلوة...وياالى خدودها رمان
على الضحكة وع الرقة وع الورد

عيونها بحر

ب أكتب عشائك كل يوم
يمكن تشوفي فيها حاجة تهز قلبك...
جايز ف مرة تغلطى..... وتقولى ب أقرى عشان "حبك"
وعشان كلامك هزنى
وساعتها هأمسك ميكرفون
وهقول لكل الناس ياناس..الحلوة دى بتحبنى
وغرامها جيش إحتلنى
وعيونها بحر
سرسب محاره جوة منى وشدنى
ورانى نفسى اللى إنقطع بينا الوصال
وعرفتنى.....
مع إنى فعلا من زمان ماقبلتنيش ولا شوفتنى
شكلى النوبادى حد تانى ملامحه أوضح
غير كل نوبة!!!!.....
يمكن دا شكلى لما بفرح !!!؟؟؟
هتصدقينى..... !!!؟؟
لأول مرة ب أدخلنى..... وألاقى ف جيتتى مطرح
شكرا لحبك جوة منىلو حتى مش مكتوبله يفرح

كفاية عندي إنه حبك.....وإنه منك
وإنه ليكي وإنه عنك
وإنه مش محتاجني أشرح
إنتي عارفة..... إنتي جوة تبقى مين
قلبي عامل جوة مني ليكي مسرح
وإتملى متفرجين

بنت الخمستاشر سنة

وهتفضلى...بنت الخمستاشر سنة
نفس الملامح والصفيرة والشريطة
.....وحاجات بسيطة
عشناها وإحنا صوغيرين
برى القلم بنص موسى
وماكنش ف دماغنا الفلوس
أو مين دا مين.....؟
عشنا الكلام من غير مايبقى بمعنيين
الحارة شربت من ضلوعنا لعب يامة
وماكنش ف دماغنا القيامة
ولاحتى عداد السنين
فردت رموشها عل الغلاية
وقت الخبيز والدنيا حر.....
.....بتضللى إنتى بسحابة
وتخمرى إنتى العجين !!!
وهتفضلى.....بنت الخمستاشر سنة
أم الخدود اللى إنكتب فيها الخجل
وإحمرروا من أول جواب
أجرنا حلاوتهم عجل
..وعرقنا من شوقهم تراب

وكتبنا "ممنوع الزَّعل"
وقت إما يخطفنا العتاب
كل الحاجات كبرت أوام!!!
إلاكى إنتى
لساكى واقفة ف المراية بتسألى صِغيرتى كام؟؟
وأَمْك بتندهلك بنرفزة الحريم
سيبى المراية وإِطلعى شوفى الحمام
كنتى الحمامة اللى إنزِع ليها الزيتون
وقالولنا دى بَتَّعت السلام
وسلام مربع للى ف عنِيها السلام

بكرة همشى

بكرة همشى.....
أيوة همشى وبعده جايز تسألى عنى المكان دة
تسألى عنى الشوارع..... البيوت
الحيطان..... الغيطان.....
ويقولوك أيوة عدى...
بس مش عارفين ل فين ...
بالأماره ..كان ف إيده زى وردة
بس كان على طول حزين
والدموع ف عيونه سيل
بس شكل دموعه غالية
واللى وجعه حاجة غالية
إسألى عنه الطريق.....
ولا بحر الغربه جايز مات غريق.....
ولا شوفى ف الإسبيتالية.....
كنا نغلب فيه كلام.....إنت مين؟؟؟!!!
طب عيونك ليه تملى مدمعين.....؟؟؟؟؟!!!
كان بيسكت ...أو يرد علينا مرة بالمحايلة
كت إيديه م الحزن بارده زى كل البردانين.....
دورى ف الحزن عنه ...برده جايز تاه هناك
أصل غيط الحزن زحمة..!!!!
بكرة يفضل منى ذنبى....."حبى ليكى"

ما الذنوب ف العشق رحمة.....!!
بكرة تفتكرى القصايد ..مرة تبكى ومرة يضحك ليها خدك
مرة تفرح غمازاتك
مرة تحزن لما تقرى وعدى ليكى.."مش راح أعشق حد بعدك"
إننتى آخر كل حاجة
كنتى فعلا كل حاجة.....بس أنا مش أى حاجة
كنت واحد ...ضمن مليون ألف واحد ...عدوا مرة من حياتك
لملم الشوق من سكاتك.....
كت بترضيه الأسيةالطناش
المجاش.....
المافيش.....
اللى مش فاضية وماجيش.....
كت بترضيه إبتسامة زيه زى الناس بحالهم
بس كت تكفيه يعيش.....
بكرة همشى...بعده جايز..بعد بعده برده يمكن
المهم إنى بحبك ...
وإنى هكتب برده ليكى وبرده عنك
وإنى هفضل ليكى إننتى ومش راح أعشق حد بعدك
بس همشى.....

حكايات مجداف

خضوع مجدافى للمينا اللى ف عنىكى
ماكنش علاقة بين موجة ف بحر سهاد
ومركب عشق فوق منها حنين صياد
ومينا قتلها شوق وبعاد.....!!
خضوع مجدافى.....
كان شالى اللى دفاكى ف لىالى البرد
وللم شعرك المفروود ف أحزانه بنور ناره
وحط ف قلبه حزمة ورد
وغناكى كما غنى المراكبية
"يا جنية"...."بحبك حتى واثت بعيد"
وعشقى زى خلخاك...تزيد لمعانه نار سحرك
وأنا عشقى يزيد بالبعد.....
خضوع مجدافى.....
عشان عشقك وطن ثابت
وحضن كبير ملوش آخر
سفينتى...ياما حضنتى..بفرحة لما بتسافر
وعند عنىكى ليه ثابت.....!!!
وعملت ليلة لله...غرقنا فيها فول ثابت
بحبك..زى مجدافى
وأحبك لما تتبسم شفايفك موج

وأحبك لما بتخافى
وخوفك يبقى أفواج
يحج لكعبة الأحزان كما الحجاج....
بكون قبلك ف أول فوج
أنام من بدرى ع الشيطان
أحوش عنك دموع رملك
وأمهدلك طريق فرحك
وأقولك خطى على مهلك
مافيش ف الدنيا أحزان
يجوز جرحك ..كسر مجدافى من صخر
لكنى حقيقى فرحان....
لأنى بحبك المينا وشايفك كل أوطانى
ف وقت إتمنعت الأوطان

سبانخ

ساعات إما أعاكسك.....
عيونك تقولى ماتسكت يابايخ
أرد بغلاسة وأقولك ياوردة
سيبينى أغمس بعشقتك سبانخ
تكلضم خدودك وتلعن ملافظى
وتحرق ف قلبى عروش الجريد
أقولك ياخايبية
لزوم السبانخ ف عشق القلوب
تقوى وتدى المشاعر حديد
بحبك يا مهجة

كانت عنيها سُنبلَة

كانت عنيها سُنبلَة.....أول ما قالوا طحين.....
لانت لطخانها.....وراحتله مدروسة
ياما كنت بوحشها..وتقولى يا "واحشنى"
والكلمة مش كلمة...!!!.....الكلمة محسوسة.....
أنا كنت ب أكتبها أول ما تنطقها....
ما تقولش بسبوسة.....!!!!!!
مرة ف شفايفها ومرة ف عنيها
ومرة ف خدودها متزوقة بياسمين
ف كتبت كوم كراريس
وكل ما بتخلص..ب أجرى وأجيب تانيين
يا #مهجة.....إنتى باريس
بكل سحر باريس.....وبكل نسوانها
وإنتى جناين الورد.....وبكل ألوانها
وإنتى السما الواسعة....وبكل سُكانها.....
الى إحنا نعرفهم أو حتى مش عارفين
ننك ملان أحاسيس.....
كل ما باجى أحضنه...!! رمشك بيمنعنى.....!!!!
قوليله يا #مهجة.....مايحطليش متاريس
ولا يختر على كمين.....
يا #مهجة زيك مين ؟؟؟؟؟؟؟؟؟؟؟؟؟؟؟

لما تزيد رقتك.....بتغلى وتعرى
وأما تبان ضحكك.....بتكونى زى العنب. وتطيبى وتنزى
وأما ف ساعات الفرح.....بتكونى ميت نخلة
وتغرقينا بلح.....وتلبسيه حلقان.....
...هزى الرموش هزى
.....خلى الحلاوة تبان

صبرك المجدول

بحبك موت.....بحب عنيك
بحب هدوءك المجدول ف ضحكة صبر بتغنى
وبفرح لما تفردلى إيديك عل الموج
وبتقولى.....عليكى بس تتمنى
وبتمنى.....أكون وياك
.....أكون جواك
أعيش صبرك على الدنيا اللى نسيك
ودايما تهعدك عنى
وأقرب ليك.....وأشبك إيدى ف إيديك
وأحط عنيا ف عنيك
ونحضن بعض ف الننى
وبتنفس..... ف سيدرك شوق
دفى إحساس يطمنى
بتفرح.....بأفرحك إحساس
ف كل دقيقة أو ثانية
وتحزن.....بأكراه الناس
وبلعن أم دى دنيا
بحبك زى ما تكون
بسيط ممكن.....فقير يمكن.....على حالك
وببقى ف غاية الفرحة

لما بتيجى تعبان..... وترمى عليا أحمالك
وبرفع إيدى وبطبطب على سدرك
وأقول ..معلش
ونتقاسم سوا لقمة
ونشكر ربنا وفضله ولو متعاصة بالمش
ومش
ممکن تكون غيرك
حنان بيدب ف عروقى
ف وقت الدنيا ما تدوسنى
وتتكى كمان فوقى.
فتحمينى فى عز الخوف
وتلحقنى ف وقت ما أكش
وبتطبطب على ضهرى بحنية
وإيدك سابقة إحساسى
وماسحة دموعى فى عنيا
وأحس بحضنك الدافى
ف رعشة إيد بتتسابق
عشان تسيقنى كوز مية
وبسجد كل ما بصلى
وبدعى ربنا يخليك
وتفضل أحلى ما ليا

ضلعين سلف

مدت إيديها جوة منى
وقالتلى هات ضلعين سلف
إستغربت عيني الكلام ! "ضلعين سلف" !!!!!
إشمعنى يعنى من فقير
أرضه بتتنشق خلف ؟
ولا كان ملك ولا كان وزير
أو حتى مكتوبله الترف ؟؟؟؟؟؟؟
فضلت تبص ف عيني خايفة
وقالتلى أمشى...؟؟؟؟؟؟
قولتلها ليه ؟ ..أنا أصلى مش لاقى الإجابة!!!!
قالتلى هسند بيها عشى
قولتلها بضلوع الغلابة ؟؟؟؟؟؟؟؟؟؟؟؟؟
قالتلى حمالة هموم
وأنا جوة منى ف الوجع ولا ألف كوم
محتاجة ضلعين أتسند يمكن آآقوم
ما تجيب بقى أو إيه نظامك ؟؟؟؟؟؟؟؟؟
قولتلها أصل
قالتلى ماتكمل كلامك !!!!
وقول ضلوعى إتحرمت على أى واحدة
قولتلها مش ناقص مناهدة

بكفاية كام عشرين سنة بخلع ضلوع وأسند ضلوع
ولا ستوميت ضلع إتخلع.....
ما تدوريش ف ضلوعى عنى
ضلوعى ف ضلوع بنت جاحدة
زمان باعتنى عشان غويشة وجمل سكر
وسابتنى غرقان ف الوجع

عارفة عيونك تشبه مين

عارفة عيونك تشبه مين؟؟؟؟
تشبه قمر الليل السارح بصفرتين
تشبه غيط القمح الداخ.....علشان يعمل سنبلتين
تشبه ورق التوت الأخضر
لما يغلس ع الأغصان
أو بيعاكس جوة ف خدك تفاحتين
تشبه درس الكيمياء الصعب
حاصل ضرب حرارة قلبي x ضغط عنيني
شئ ببعدي الحل تملئ ب كراستين
تشبه كل عقارب قلبي
لما بتجرى ف وقت لقانا....ودايما تسبق بدقيقتين
عينك ليه بتقولى حديث؟؟؟؟
خدك ليه مليون حواريت؟؟؟؟
ورد الدنيا بيزعل ليه!!!!؟؟
لما بنيجى ونهتف عندك تحت البيت
أو بنحذف رمانتين
فاكرة النخلة؟؟
كبرت فوق التل وطرحت
طرحت زيك عشق حلال
عارف طبعا

كل الناس هتقول هوال
أول ما أمسك قلمي وهكتب
إننى' لأول مرة بقابل..وش ملايكة بغمازتين
ليلة إمبراح.....
قلبي إصطادلك عصفورتين
قلب مفكر نفسه ف حرب
طالع نازل يبدأ عشقك برصاصتين
قلب بيعشق جوة ف خدك جدول ضرب
حاصل ضرب حنينى x شوقى
ناتج حالة (عشق) 2^2 مربع أس إثنين
ما إنتى يا أحلى عيون حلوين
مش موجودة إلا ف حالتين
حالة عشق يقينى مؤكد
وحالة عاشق سحر عنكى
واخذ فيهم سجن مؤبد
يعنى خلاصة القصة ف جملة
"إنى بحبك ف الحاليتين"

على الكوبرى

على الكوبرى
وبين أسدين بيتعاركوا على عنيكى
ونيل سارح على خدك
ب حمص شام وتين شوكى
وترمس عشق متمرد على القرطاس
عيون ملكة بتتمشى على الكورنيش
بدون موكب وحراس
ف تنده ليها ميت مركب
وتضرب ليها أجراس
لكن هيا.....
بتعمل روحها مش سامعة
دلال مفروود على الموجة
من الأسدين..... لحد مايوصل الجامعة
على الكوبرى أنا وإنتى
وف عنيكى... بشوف الشمس بتدفى ضلوع بردان
وأنا المقتول ب لسعة برد
عنيكى بتشبه الورد
ف وقت الفجر لما بيبقى فرحان
ويتوضى من الشبورة ويصلى
وأنا معاكى ميسألشى

إيه المفروض بيحصلى
عشان عاشق وسابق كل عشاقك
ما أنا الشاعر وأنا العاشق وأنا الولهان
وانا المدلوق على وشه ف غيطان حبك
فمين منهم هيوصلى؟؟؟؟
على الكوبرى وف عنيكى
خرز مجدول ف تعويذة وألف حجاب
نبوءة عشق محنية بتزرع شوق
وتكتب فيكى ألف كتاب
وميت قصة وألف رواية وقصيدة
ونيل فايت لشطه جواب
وبيقوله أمانة يصون جمال سحرك
لو العشق اللى فى ضلوعه نسيه أو غاب
كتير بسأل عن الحب اللى ف عيون المحبين!! !! ؟
عن الساعة !! ؟
عن الكام وردة ف عيونك وساكنين!! ؟
وليه إنتى!! ؟
وليه إحنا!! ؟
وامتى وفين بقينا يا دنيا عاشقين!! ؟
يكون الرد فى عنيكى قصيدة شعر
"ربك سبب الأسباب"
خلق حوا عشان آدم
وف عنيتها حنان مجدول

هيوصل منه للعالم
وهيكمل عشان بكرة اللي شارب سحر شفايفها
رموش عينك شرع مركب
بتتمايل على موجة حنين مكتوم
وتخبز م الغرام لقمة..تفرح كل مظلوم
وف عنيكى بكون فايز مانش مهزوم
ما أنا المقتول ف تجديفها
رسمتك شجرة بتغنى بدون آله
وفرع حنان بيعزف صدق ألعانك
نغم أخضر يونسنى ف غربة شوق
وشوقى ألف رحالة
وميت رحلة
وألف قصيدة بتسافر
لا بتخاف من البعد اللي ساكن ف شتا أرضك
ولا مطرة حزين مغروس ف طين وحلة
فالبراحة
على الغلبان اللي طلب قمحك
وفى ضلوعه غرام طواحين
ياستى ربنا يسامحك
لو السحر اللي ف عيونك ملوهش حلول
بيجى يدوس على المساكين

الفضيحة

ياللى إسمى بين شفايفك زى وردة
لسه مولودة النهاردة
والنسيم عطرها ريحة
عينى جبلت من غرامك شوق ولهفة
بس عاجزة إنها تدارى الفضيحة
شوقها أكبر من كلامها
والدلال ف عينيك غواها
كنت حزن كبير أوأها
نام معاها ف كل حتة بكل شكل
ف الشوارع... ف الجنائن .ف القصايد
لما تاكل لما تشرب ...لما تقرئ ف الجرايد
حتى مارحمتش منامها والتزامها بالأسامى
سلمتلك كل حاجة وأى حاجة
وأما نن ضلووعها تنفخ والحنين حرك حشاها
جاية بتقولك محامى.....!!!!!! "ههههههههههه"
القانون يانن عيني مايحابيش لمغفلين
أو بيسجن سحر عين
أو بيقبض على العيون المحتالين
أو ينصر مخدوعينأو بيرفع موجوعين
القانون محتاج قانون

والحكاية حلها بس بتراضى
قعدتين وكلام عيون...وانتى راضية وهو راضى
أما تتهميه بشوقك !! تبقى خايبة
ما إنتى دايبة وهو أصلا خده قاضى...
والقضية خلصانله...وانتى مهما عملتى عاشقة
يعنى قبل ماترفعيها...!!؟ إحسبها ..إنتى خسرانة التقاضى
لومى نفسك قبل ما تلومى ف جماله...
سيبتى نفسك ليه تحبى أو تدوبى ف سحر ننه ؟؟؟؟؟؟؟؟؟!!!!!!
ما إنتى روحتيه بمزاجك عند باله ...!!
ليه مضايقتك لما شيلتى منه شوقك...إنه ناكر إنه إبنه.. ؟؟!!!!
هو شايفك مش عفيفة...مش شريفة
حد رخص نفسه عنده
صدقينى
الحكاية مش ظريفةوانتى مطعونة العفاف
حل واحد تصبرى بشوقك شوية
يمكن المعشوق يحن..وبعد حبة ..تاخدى من عينه إعتراف

عينك بيوت

عينك بيوت.....ساكين على قلبى الببان
ومدفين كل الضلوع
متربين عل المجدة
ما إتعودوش عل المرقعة وندغ اللبان
واخدين على عيشة زمان
متمسكة بتقاليد زمان وكلام زمان.....
* "عيب تبص لحد غيرى....ربنا بينى وبينك"
* "عيب تعاكس.....هو أنا مش مالية عينك ؟!"
* "ضحكة حلوة ☺.....إختشى وخليك مؤدب"
* "محللى نومى بين ضلوعك ف العصارى ..لما جو العشق رطب"
* "ألف شكراً يا حبيبى عل البنفسج.....كل ما بتقبض مرتب"
* "خد رموشى وإستغطفى الدنيا برد"
* "النهارة وإنت نايم جوة منى.....عينى طرحت أحلى ورد"
* "طب تصدق !!!؟؟؟.....النهارة عيونك إنت بخرونى
ورشوا ف خدودى المَورد"
* "قول بجد....."
* "ثوما هتغنى النهاردة...؟...ولا نسمع عب وهاب"
* "طب بلاش....إحنا نسمع عب حلیم ف بلاش عتاب"
* "القمر زارنا النهاردة وكان معاه لعنیک جواب"
* "طب تصدق...؟!..السما رسمتلى صورتك ع السحاب"

لما كنت الصبح طالعة...أسقى زغاليل الحمام".....
.....هى دى عيونك يا #مهجة وهو دا كان الكلام
علمونى الإحترام.....
فهمونى إزاي أحبك.....
لما باكل..لما بشرب...لما بحلم..لما بصحى ولما أنام
وضحولى ليه بحبك....
عرفونى لما أحبك عمرى ما أنا عامل حرام
بعد كل كلامها فاكرة...؟؟؟... إن ليا ف نفسى حيلة
لا يا #مهجة.....إنتى عينك أحلى عين حلوة وجميلة

فاكرة أول مرة شوفتك

فاكرة أول مرة شوفتك....
كت عيونى معلقين ف رموشها زينة
كنت بحلف إنها بداية السعادة....
وإنى بعدك....هنسى بداياتى الحزينة
كنتى أول واحدة ماتبصش لشكلى
أو تقول شكلك تخين .وإنى نكدى وكل حبة بكون حزين
كنتى أول واحدة تحضنى بمشاكلى
وتلاقينى جوة نفسى وتكتشف أنا أبقي مين
لمعة الرقة ف عيونك كت بيوت
للمتنى من شوارع غربتتى
دخلتنى بين ضلوعها الدافينين
وإبتدت تعزفلى غنوة.....
كنتى حلوة....وكت عيونك سرحانين
نزت السهد ف ضلوعى ...وقبل منك كان مافيش أصلا ضلوع
كل حاجة كت معاكى هناك فاكرها
فردت الإيد الملايكة اللى إتفرش شوقها بسببتها
للممت منى الدموع
العيون اللى إنكسر بالشوق ثباتها

وإتملت شجرة بفروع
كل حاجة هناك فأكرها وبحاجتها
إلا حاجة واحدة بس.....
إننا يومها إفترقنا.....
هى دى الحاجة الوحيدة اللى إتمحت منى ونسيتها

عينك وطن

فتحت ببيان السجن ..
وقالتلى قوم وأهرب
قولتلها مش قادر.....
سجنى ف عيونك وطن
وأنا بره هأتغرب....
معناته إيه الوطن جوايا من غيرك
وشكله إيه الوطن برة زنازينك
ما إنتى اللى حضنك دفا مش لسه هنجرب.....

بحر الحنين

فكت ضفايرها... ورمتها على خدى
وقالتلى قوم عدى
بحر الحنين مفتوح والمية هتشيلك
إرمى الضلوع بشويش
لو كارهة مش راجعة
وإن حابة ترجعلك ؟....هى اللى هتجيلك
نيلى قصاص نيلك
والمركبة بينا مطرح ما هتودى
كان حضنها دافى وخدودها مخطوفة
رمانها بالذوفة
والعشق كان طايب وب عنبه حدفنى
البحر خوفنى
شافت ف عينى الخوف ضحكت ف رجتنى
أول ضلوعى سقط ووراه كمان ضلعين.....
وطت ولتتنى
وقالتلى إوعى تخاف
كان رمشها صفاف
قطفلتلى منه إثنين.....
وقالتلى مجدافك. بَحَر وقدفنى
الشط من يمك وإنت اللى بتشوفنى

وضلوعى من غيرك..... ضاقت وضاق نيلها
قولتلها مش هقدر.....مش ممكن أعملها
إستغربت ردى ..وقالتلى ليه خايف!!!!
HYPERLINK "https://www. [جائز بنات عشقك كارهة عيون](https://www.facebook.com/hashtag/%D9A%AC%D8%D8%87%D9%85)
A%AC%D8%D8%87%D9%85%facebook.com/hashtag/%D9
source=feed_text?9" #مهجة

قولتلها مش ممكن
شوقى لعين #مهجة ولا تلوميت مركب
سحرك فواعلى غرام هو اللى حملها
حطت دلال عينها على ناصية ف خدودى
بصت على ننى وقالتلى سلمها
وإديتنى عوامة
روحتلها وبخاطرى...
ركبت على ضهرى ودخلنا دوامة
ومن ساعتها بدوخ.....ما إنتى اللى خدك خوخ
وإنتى اللى نك سحر
وإش ينقذ العاشق من دوامات البحر
لو عملوا ألف حجاب وأجرلوله شيوخ

كافيه

كانت عيونها مبحرين
لمة فانوس النور على سور الكافيه
وأنا جنبها على كرسي حاش بينا النسيم
ورسمها زى الإسمه إيه....؟
حاجة كده غنلها دايمًا عبحليم
كانت ساعتها أحلى بنت
صنف إتخلق ومالو هشى دعوة بالحريم
تقول ملاك وف شكل ست....!!!
لو حد قالى ماهيا ست.و"ست أبوها" برده ست!!!
هقوله أسف حضرتك "ستات على فيض الكريم"
قصد الكلام.....
جالى الولد وقالى تؤمر حضرتك؟
ف طلبت شاي...وهى قالت لاء شوية
فشاورتله "الشاي دا سادة"
أنا أصلى جنبى السكرية
كانت عنيتها وقتها ولا "خُن" نور
قعدت تايه فيها ساعة
أسأل ضلوعى اللى إتحشر فيها الكلام
وعاميلى*أزمة ف المرور
إزاي نأجر جوة منها بس قاعة ؟!!

تحضن ضلوعى ف الشتا من غير قوالة ؟
فرسمتها طشتين وقلة
وسألتها من غير كسوف
كل العيون أوضتين وصالة !!!!
إشمعنى عينك إنتى فيلا
ضحكت ولا أروع غزالة
وقالتلى إيه؟
قولتلها إيه؟
فقالتللى إيه؟
رديت عليها تانى إيه "مشتاق يا فلة"
وفضلنا نضحك ف الكافيه
زى العيال من غير حساب
حطيت إيديا فوق خدودها السرحانين
وبدأت أفتح ف الكتاب
وف كل باب
كان يبتدى بغصن الرتون..... وبينتهى بحالة جنون
فدماغى دى قعدت تلف!!!!!!
مجنون يا إنتى بكل حاجة فيكى صابحة
وبقول لنفسى الللى إنكتب ليها الجنون
دخلتى ولا ألفين مصحة!!!
وبرده مش عارف أخف!!!!
وحصلى شىء م الإرتباك
حسيت بانى كنت بحلم

والحلم صعب الإمتلاك
ومشيت على لسانى السؤال
طب ست دى ولا ملاك ؟
لكن إجابته أكيد هناك
لسه على كرسي الكافيه

كان سؤالى

كان سؤالى ...

لو رسمتك بالقصايد تزعلى!!!؟

تغضبى!!!؟

تكسريها وتهربى!!!؟

لو زرعت العشق ف خدودك فرح!!!؟

وحفرت نيل يسقيها من عرق البلح!!!؟

ومليت كفوفى منه ليكى.تشربى!!!؟

كان سؤالى.....

ليه عنيكى بيفتحوا على جنة واسعة!!!؟

على غيط ملان سحر ودلال

كان سؤالى...

ليه شيوخ العشق قبلك حرموا رسم العيون !!! ؟

وقالولنا ف عنيكى الحلال...!!!

كان سؤالى.....

عن عنيكى ... !!!

نورها ليه زى القمر!!!؟

كل ما إما بملى عيونى منه ب أتحول

هيا ليه زى العنب!!!؟

لو عصرتة يقولوا خمرة

ولما بشرب ب أنتول!!

ياااااا يا إنتى
لو تسيبى الفرشة ترسم
أو تشخبط
كنت هعمل من حنينى طيارات
وكنت هرسم فوق خدودك ألف مهبط

هوه ليه ماقبلتكيش من يجى كام عشرين سنة!!؟
لما كان للعشق جنة وللمشاعر السنة
لما كان الشعر معروف بالقواله
والغرام ملهوش حرس
والبنات زى السواقى بيعملوا م الرمش آلة
وبيعزفوا ب ديل الفرس
عدى ميت مليون سنة قبل إما أشوفك
وإنتهى عصر الفرص
والمحطة ..عفرت وشى بترابها
والوابور للمم تذاكره
والجرس ...دق الجرس !!!
السلاماااااااااا
للى ف عنيه السلام
للى ف عنيه القمر
عامله ميت غية حمام
بينتهى إسمى بقصيدة
وإنت شىء مهما أكتبه مايبينتهيش
مع إنى خلصت الكلام !!! !!! !!!

مجاز

كانت عنيتها بيسمعوا وييلمعوا
تقولوش بنات وإدلعوا.....!
لكن على شوق اللقى ف حض الكلام
شوقى ساعتها قام أزح حد السلام
كان نفسى جامد أحضنك
أحضان كتير معرفش كام ؟
وحشاني موت
وبعتلك جوابين لوذاذ
ورسمت عينك ع الإزاز.....وحضنتهم
والناس تقولى بلاش مجاز
إش فهم الناس المجاز ومجازش غير إنى أرسمك
جناحين على غية حمام
بيرفرفوا بشوق القصيدة ويحضنوني ف الكلام
عينك ولا فدان قصب
صالب عيدانه جوة منى
ومخبى منى جوة منى
وإنتى منى ومنى منىيامعششة جوة العصب

كل الناس بتحبك شاعر

كل الناس بتحبك شاعر.....حتى حبيبك
حتى الوردة اللي بتسقيها وريحتك فيها
حتى الفكرة اللي بتبنيها.....
.....وبعد شوية بتبقى جريمتك
حتى الحزن اللي بيبنيك بيت ف ضلوعه...
..وكل شوية بيلعن سيرتك
حتى القلم اللي بتبريه وبتكتب بيه
حتى الورقة اللي إنت شاريها بربع جنيه
كله بيعشق بس قصيدتك
طب ما أنا سيبتك.....
تثبت ليهم إنك عايش...
وإنك واحد لحم ودم.....
.....عمرى عاتيتك!!!!!!؟
كام إتناشر مرة سابوك ؟
كام إتناشر ألف داسوك؟
كام إتناشر مرة فاتوك على شط جراحك؟
وكام إتناشر مرة أنا جيبتك
طب كم مرة الحب يسيبك ؟.....
.....فوق الشط بتغرق وحدك
وإنت لوحدك.....

.....رحلت أنا جيبتك
ليه مش عايز تفهم إني.....
.....إني حبيبتك.....وإني قصيدتك
وإني برغم جراحك فيا.....
عمرى ف مرة ماجيت وكرهتك
وإني عاشيقتك.....
وإني ملامحك هي ملامحي.....
وإني فعلا أكبر جرحى.....وإني جريحتك
وإني ب لونك.....وبمضمونك....
وإني خدودك وإني عيونك
وإني ضلوعك وإني جنونك
وإني قصيدتك وقت الزاد
وإني بطاقتك نفس بطاقتى.....
نفس الخانة الكاتبة "عماد"

ياحبيبي لو مشيت

ياحبيبي.....
لما تمشى
إبقى سيبلى حاجة منك لو مشيت
إبقى سيب تنهيدة واحدة
وقت برد الوحدة تنفع...أبقى أعمل منها بيت
وأوعى تنسى لما تبعد عنى يومها.....
لما تضحك تبقى تبعك ليا ضحكة...ولا دمة لو بكيت
كل حاجة فيك حبيبتى....حتى حزنك
أوعى تنسى بلاش ياريت.....
كل حاجة سايبها ليا....لما ترجع هتلاقىها بنفس ريحتك
هية هية
القصيدة اللى إترسم بعينك كلامها ف الكافيه أول ماجيت
ضل عينك لما ضحكت ليا مرة وإنت سايق
إبتسامتك لما مرة مسكت إيدى ب ن ن رايق وإنتشيت
فرحتى بعد إنتظارى ليك ساعات...وإنت متأخر وجيت
أوعى تنسى...
إن ليك ف ضلوعى قصة....
وإنى لسه...
كل حاجة فيا ملكك لو نسيت
خلى بالك من عيونك...كل فترة إكتبلى عنك
خلى بالك جد منك
وأوعى تنسى إنى قبلك...كت ضلوعى عريانين
وإما شوفتك إنكسيت
وإنى حبك جوة منى مهما تبعد أو قسيت

مبادئك الثابتة

ماهوش ذنبك.....بان الحب ف ضلوعك مالوش نبتة
وإن مبادئك الثابتة.....
شايقة ف الحنين عيبة
بتغلب رقة التكوين...وتحرق مخزن الطيبة
يجيكى ستوميت خيبة
عبيطة وعاملة بتفتح
ياوردة
سكت الفرحة على الشوك اللي ماليتها
كتير كان نفسى أسقيها.....
قصيد شعر من شعري.....والأقى ف عينها لو مطرح
دا سحرك لو طلب فيلا...فيلا.....هبيع الدنيا وأبنيها
وأكونك ستلاف مطرح
عيونك هزت المسرح....فبكانى جمال النص
جمال الدمعة ف عيونك
دلال الحزن ف الفئجان
وشوفتك بطللة الشعر اللي علمنى أكون إنسان
وخلانى عشان خاطرك.....أحب الحزن
وأدوب من زحمة الأحزان
بحبك.....وإنتى بدموعك بتنسينى
وأحبك وإنتى كارهانى أكونك بيت

وأحبك وإنّتى منعانى أقول حبيت
وأحبك لما ماتجيشى معاد بينا...
وأدوب من بس " دا نسيت".....
ياناسية

إن ف ضلوعى قسايد شعر لعيونك
قتلنى فيكى ممنوعك.....وكمل ضرب بالشلايت
لكل حكاية ممنوعة طريقة حل...
حتى ف طاولة العشق أم باب مسكوك
وقايمه ضلوعها ع "السك"
وزارعة ف نردها الشوكوخاطفة م ال"قشاط" قلبه
يامسكانى ف خانة ال"يك".....
ولايمانى على حزنك وأنا حابه..."
قشاطك لسه بين خشبه.....ولسه ل الأمل حكايات

متولى

قالتلى مين إنت!!
قولتلها متولى...
قالتلى م الحِته..؟
قولتلها من بابل..... ونفسى نتقابل
وأرسم عيونك مزز ماكنتش بتقابل
وأكتب على خدودك "تُخص متولى"
ضحكت وضحكتها دقت ولا الساعة
وقالتلى طب قولى
بيتك مكانه فين؟؟؟؟؟؟؟؟
قولتلها ع التبة.....لساته بيت ب الطين
ومافيهش غير قاعة
وزلوع بناه الشقى ومافيهشى ولا حبة
أو حتى كيلو طحين
لسانى بجمع حطب وأبنى بيوت غيرى
تستاهلى واد غيرى
إحنا اللي مش فاهمين.....
إن الذهب للذهب
يتلف جوة حرير مش طرحة بالتولى !!
قالتلى متولى.....!!!!!!
.....قولتلها متولاش

الحب مش ببلاش
وعنينا وقت الوجع هتشوف غرامها طشاش
وهتلعن الصورة
ناوليني قطف العنب وإتوصى بالخايب
قالتلى يامنيل عنب البنات طاييب
قولتلها مش فارقة
وإديتها تعريفة فقالتللى ما تخلصى ؟
قولتلها مستورة
ومشيت على مهلى
كان نفسى تندهللى وتقوللى خليك
أرجوك بلاش تمشى
لكن القدر مكتوب
واللى إنتصر مغلوب
عدى معاد العنب
والقطف ف ضلوعى لساته ما دبلىشى

مجبـرين

كانت عنـيها زى ماتقول بحر واسع
إتقابلنا فوق مراكبه مكسرين
كان مابينا فرق شاسع
فرق أكبر م الكلام ومن السنين
كان مابينا ألف خط.....
هى عايـزة تلقى شاعر
بس قلبى تاه ونفسه يلقى شط
فإفترقنا مجبرين

هما ليه إستغربوني

هما ليه إستغربوني.....!!!!!! ؟
لما قالوا البحر واسع.....
قولت لاء عنيكى أوسع
حسسوني بإنى لاسع
وإن كل كلامى كذب
وإن دى جالتى إما أحب
وإنه طبعا فرق شاسع
بين عنيكى وبين بتاع بيقولوا "بحر"
مايسويش ف عنيا حتى ب ربع لب
إنتى حاجة تانية خالص.....
إنتى حضنى.....
لما ب أتعب م السفر جوايا وأرجع
وإنتى شبعى ف عز جوعى
لما أشوفك بس ب أشبع
إنتى فعلا بنت حلوةبس أحلى حاجة فيكى
إنك إنتى بنت مجدع
طب قوليلى؟؟؟؟؟
بنت زيك عينها ماس
والخدود برلنت حر
والرموش صفين سبايك

والشفافيف الماظمات
عارفة طيب "سلمى حايك" ؟؟؟؟؟؟؟؟؟
جنب منك مش بنات
إنتى أصلا مش بنات !!!!!.....إنتى "ساغة"
جوة عينك نص دستة خمارات
لمة فيهم أحلى ناس
والنبيز بتعتقيه جوة ف شفافيك
بعد إذنك لو هينفع صُبي كاس.....؟
خلى قلمى يوصفك شعر وبلاغة
جوة راسى رقتك عاملالى غاغة.....
لو أساسا لسه فاضل فى راس....
الكلام اللى ف عنكى صعب وصفه
والقلم من كُتر سُكره من شفافيك
جد خايفك....تاه ومتحجج ب قصفه
حبة حبة يا أحلى وردة وبالهداوة
قلبى مش مستحملك رقة ودلال
قبل منك عودوه يفطر باتيه
جت عيونك فطروه زبدة بحلاوة
طب قوليلى يعمل إيه.....؟؟؟؟؟؟؟؟
غير هيغضب على الباتيه زى العيال
غير هيعمل ألف وش
واللى طالع فيه يعيط.....كل يوم عايز حلاوة
لو سمحتى وبعد إذنك.....؟؟؟؟؟؟ ممكن آخذ ساندوتش

كان نفسى أحبك

كان نفسى أحبك.....
زى كل الناس ما حَبوا
وأشتريلك وردة مرة وفلة مرة
وكل مرة تبقى وردة وفلة حمرة
وإن قالولك إن لون الفل أبيض...
وإنى بكذب....
قولى شارب من عيونى شوق وخمرة
وإنه ماكدبش ف كلامه
وإن لون الفل لونى...وعمرى مرة ما كنت سمرة
نفسى أحبك.....زى كل الناس ما حَبوا
مرة فرحة ومرة دمة ومرة نبكى ومرة نضحك
كل حبة خناقة شكل ومقموصين
بعد حبة.....
يبقى شوق الدنيا فينا ومشتاقين وموجودين
تبدأى التلاكيك ببصة ضاربة بوز
بس عينك حاضنة عينى وعينى جابت ألف كوز
أملى منهم خمرة وأسكر.....وأفضل أسكر أفضل أسكر
وقت عينك م البكى وبكتر رغبة الحنين تعمل "كلوز"
ساعتها بس بتترمى كلك ف حضنى...
وبترمى كلى ف ضلوعك

وأمسح دموعك وأسجنك ف ضلوع عجوز.....
.....قرب يقفل ل الاربعين
كان نفسى أحبك.... زى أى جوزين حمام
الصبح بوسةوالضهر بوسة..... وكل بوسة بفدانين شعر وكلام
وبيعملونا الغية برج.....
وعشان نوافق نبقى مراسيل السلام
بيأجرو لنا جيتار و"أورج"
وبيعزفوا مليون سلام
ياسلام يا #مهجة وستلاف مليون سلام.....!!!!
وإحنا طاييرين ع السحاب !
وبتخبطيني برقتك وجمال جناحك
ساعتها بس أنا بكتبك مليون جواب
ويقول لعينك.....شاطرين يابت
أنا دويت دوب ...وأهي دى بقى شهادة نجاحك
مبرووووووووووووووووك يابت

يا بختك يا مُهجة

يا بختك يا مُهجة بقلب الزناتى
وعرقه اللى غرق خدودك بموجه
وقافل شفافيفك بضمة شفائيفه
وحابس كلامه ومانع خروجه
بحبك يا مُهجة.....
بكل الغيطان اللى شابت ف راسى
وكل الجدور اللى شربت ب فاسى
وكل البنات اللى عدت ف عينى
ولا واحدة منهم لقيتها ف مقاسى
وكنتى العباية الوحيدة اللى "قدى"
ونفسى اللى طالع ف قلب البلدى ... بحبك يا مُهجة
يا بختك يا مُهجة
بقلب إشتراك طاحونة كلام
عشان السنابل ف عينك ما تكبر....
وبعد إما تكبر هنعمل طحين
وبعد إما نطحن هنعمل عجين
وبعد إما نعجن هنخبز جمالك
وناكل ونشبع بعيشك حنين
وفوق الخدود الجومال العذراى.....بنيت الزلوع
عشان إما تشتى ساعتها بدموعألقى الخزين

خَزِينِكَ سَنَابِلَ
وَرَمَشَكَ سَفِينَةَ بَتَحْدَفِ قَنَابِلَ
وَتَحْرِقُ ضُلُوعِي بِشَقَاوَةِ صَبِيَّةٍ
زَعْلَهَا بِيَشْبَهُ زَكِيَّةٍ تَوَابِلَ
بِيَحْرِقُ صَحِيحَ
وَلَكِنْ يَحْبُوهُ بِنَفْسِ الْمَقَابِلِ

الفهرس

مسلسل	القصيدة	رقم الصفحة
1	إهداء	3
2	أطلس عيون مهجة	4
3	إتسرقنا	6
4	وقت صعب	8
5	يلا إخرجى	10
6	أسف قوى	12
7	أصعب دمة	14
8	البندقية	16
9	البنفسج	18
10	للحب ناسه	20
11	العيون المكسوفين	22
12	سنة بيرة مشبرين	24
13	الكانون	26
14	أبوة بحبك	28
15	بحبك ولكن	30
16	بنت مختلفة	32
17	عيونها بحر	34
18	بنت الخمستاشر سنة	36
19	بكرة همشى	38
20	حكايات مجداف	40
21	سبانخ	42

تابع الفهرس

رقم الصفحة	القصيدة	مسلسل
43	كانت عنيها سُنبلَة	22
45	صبرك المجدول	23
47	ضلعين سلف	24
49	عارفة عيونك تشبه مين	25
51	على الكوبرى	26
54	الفضيحة	27
56	عينك بيوت	28
58	فاكرة أول مرة شوفتك	29
60	عينك وطن	30
61	بحر الحنين	31
63	كافيه	32
66	كان سؤالى	33
68	مجاز	34
69	كل الناس بتحبك شاعر	35
71	ياحبيبي لو مشيت	36
72	مبادئك الثابتة	37
74	متولى	38
76	مجبرين	39
77	هما ليه إستغريونى	40
79	كان نفسى أحبك	41
81	يا بختك يا مُهجة	42